



孫宗伯集卷之一

明句吳栢潭孫繼臯以德甫



門人會稽劉毅健甫甫校

後學陽羨陳一教函三甫校

門人雪川沈宗伯聲甫同校

冊文

昭妃冊文

皇帝制曰朕恭承

慈訓式叙彝倫惟玉化始於宜家既肇建

中宮之位而壺政資於多助用敷求內職之良
名號攸崇典章具在咨爾劉氏柔嘉爲性貞
靜自持禮度夙閑動有珩璜之節言容純備
行符圖史之規爰副

長樂之簡掄俾翼坤寧之教範茲特封爾爲昭妃
象應四星麗紫垣而耀彩榮先九御煒彤管
以流芳服此寵光廸惟淑慎尚祇勤於夙夜
用集慶於家邦欽哉

宜妃冊文

皇帝制曰化先閨闈式資協贊之良禮重

宗祧宜廣繼承之道爰率備官之茂典載頒叙進
之明恩光我壺儀亶惟邦媛咨爾楊氏儲祥
令族毓粹中州端良合法相之徵窈窕副好
述之選徽容有擘已參景曜于軒龍懿號所
加宜亞聲華于綸翟茲特封爾爲宜妃椒塗
敷秀聿昭四德之休蘭殿承芬用佐二南之
化尚其祇服勿替執勤勉遵圖史之規丕行

本支之慶欽哉

誥命

少傅兼太子太傅禮部尚書武英殿大學士

張四維 誥命

奉

天承運

皇帝制曰朕精求理道眷倚名賢冀紹脩謨烈之
隆用敷賁基圖之重帝賚予弼官惟其人二
公宣寅亮之勲三載奏奮庸之績宜頒異數
以示崇恩咨爾具官涵經世之才猷抱佐王

之道術有奧行闕深之識而出以恠恠有端
方直亮之操而將之謹恪簡自

肅祖翼我

先皇史局官僚身久依于日所佐銓長翰望雅重
乎機衡泊於朕躬爰立爾相會端尹踐中台
之席由秩宗躋亞保之班爾乃感特達之深
知罄生平之積蓄敷陳堯舜若謂吾君為能
殫竭謀猷猶曰我后之德以正色表儀乎群
辟以和衷叅決乎萬幾睠此乾坤之清夷良

由左右之弼直膚功來上朕志允諧孤卿加
帝傅之銜四輔晉佐師之秩茂延世賞申需
廷綸仍授爾階光祿大夫勲柱國錫之誥命
於戲朕方詢事以考言故嘉乃丕績朕甚尊
師而重傅故陟爾穹階尚其肩鼎足以承君
秉丹心而率職唯德唯義道益進于保躬作
醴作羹忠無忘于訓志登闕上治光輔中興
欽哉

制曰朕惟樞機之佐夙夜在公固上臣之事君

不有其家亦中閨之有淑相在爾室肆舉懋
功之典並疏從爵之恩國有彛章今為異數
爾具官妻封一品夫人王氏誕秀高華儷芳
名碩柔嘉自性德咸中乎珩璜靜正為儀動
一遵夫圖史眷茲內美襄我元僚酬寅亮之
崇勲霈申重之寵命是用仍封爾為一品夫
人度表山河增賁六珈之飾徽揚江漢祗承
三錫之榮

制曰自古帝王之佐社稷之臣其出也有為而
功德所被不止一民一物之微其生也有自
而善祥所鍾不止一世二世之積故恩禮特
隆於宰輔而寵褒覃及其曾先爾贈光祿大
夫少保兼太子太保禮部尚書武英殿大學
士張寧乃具官四維之曾祖父長者之心仁
人其行曰唯孝友於兄弟有善於身不求聞
達於家邦無名於世百年所積三葉而昌若
金作礪而旱作霖允資弼鉉如水有源而木
有本宜霈休綸是用加贈爾具官寧階峻秩

彌彰天錫之隆厚祉餘休益篤雲仍之祐

制曰國家尊禮元僚寵頒異數凡追崇其上世
得並逮于曾闡矧從一居貞亮清白之節保
孤求祀開熾昌之圖在古不磨於今為烈爾
贈一品夫人雷氏乃其官之曾祖母夙稟慈
訓來歸德門中道而失所天矢心則有如日
撫一綫之脉更子而孫堅兩髦之儀繫女而
士眷經邦之偉績嘉啓祚之弘功是用仍贈
爾為一品夫人懿範如新誦栢舟而慕義明

恩未艾紀彤管以流芳

制曰夫幽潛之士厚積在躬而慶常流於後爰
理之臣弘施在世而源常濬於先故國家申
眷于宗工則恩數特隆于祖考非獨明有始
之義亦俾行無疆之休爾贈官張誼乃具官
四維之祖父天子敦龐力行孝弟與物無競
有仁人長者之風直躬而行無靡麗紛華之
習蓄其善祉開爾聞孫弼予一人如巨川之
作楫興於再世殆高山之出雲宜有顯褒以

彰明德是用贈爾如具官秩崇上佐丕揚祖
廟之光恩音重原永篤相門之慶

制曰夫誦共姜之詩則慕其烈讀令伯之表則
哀其情然共無聞於立孤而李弗有於追顯
孰與我奮庸之佐蒹葭夫蒸畀之儀亮節彌
光鴻名並久爾贈一品夫人解氏乃具官之
祖母早以淑媛歸於哲人違偕老之期艱難
備歷矢靡他之誓志操逾堅奚翼子以貽孫
肆承家而秉國懋著上臣之偉績丕揚王氏
之徽音是用仍贈爾為一品夫人風教是維
為信史必傳之事霑恩斯渥慰聞孫欲報之
情

制曰明王立政不惟其官唯其人積善降祥不
於其身於其子蓋帝賚良弼非偶而天佑善
人靡常若乃身居樞筦之司亦有父逮鼎鐘
之養造化所篤朝廷罕儔爾乃具官之父樸
茂居貞慈祥好施誠心直道追三代之遺風
達德高年望百齡之厚祉誕啓禹臯之佐弘

敦堯舜之猷於身親見其成當世陰蒙其賜
載疇義訓申錫恩綸是用封爾如具官杖屨
優游為天下之大老眷纓舄奕極人間之至
榮益迓天庥適觀相業

制曰母之愛子靡弗知勞而身顯則教益彰子
之愛親靡弗知慕而位高則思愈切肆國家
有善推之典而臣子無不盡之情至我輔相
之元僚允極褒崇之異數爾王氏乃具官之
母天子靜貞性含慈惠言為姆訓揚列傳之
徽音行合婦儀肅名家之禮法寔相夫而迪
子爰作弼以匡君經綸見機杼之遺調燮餘
栝棬之戀宜申溼寵以報劬勞是用仍贈爾
為一品夫人九原焜燿彰昊天罔極之恩三
錫駢蕃慰大孝終身之慕懿靈不昧明命其
承

少保兼太子太保禮部尚書武英殿大學士
張四維并妻誥命一道

制曰朕尊親立愛錫命疏恩睠茲小大之臣咸

孫宗伯集 卷之六
被休嘉之慶矧貳公弼亮式賴忠賢而一德
寅恭克襄孝治不有寵褒之渥曷彰眷倚之
懷咨爾具官張四維名世偉人熙朝宿望有
博達淵潛之識而本之忱恂有端方直亮之
操而將以勤恪自服官於史局已夙望乎英
聲洵陟宮僚多講幄論思之益升華翰署冠
文學侍從之班旋躋銓部之貳卿克佐建邦
之六典

先皇帝用以遺朕俾尹儲闈余一人勞於求賢延
登揆路感酬知遇弘宣承辟之猷殫竭忠貞
式展經邦之畧運陶甄於鼎鉉罄謀斷於樞
機譽寔兼隆勲勞茂著允諧朕志庸示眷酬
四輔晉秩於春官孤卿加銜於殿學茲以覃
恩授爾階光祿大夫錫之誥命於戲三少之
官于今已備五臣之烈自古稱隆卿其勿替
初忱于以追蹤往哲股肱一體朕將賡喜起
之歌師保同心爾益效燮調之績敬乃有位
求孚于休欽哉

制曰賚余良弼眷惟名世之賢宜其家人資于
好逌之助恩禮旣隆於朝宁光華亦逮于閨
闈厥有上彛用章內範爾具官張四維妻累
封淑人王氏克配君子卓為女師訓服衿釐
肅名家之禮度動遵渠燦揚列傳之音徽繫
茲相業之光昭實賴壺儀之淑慎宜從崇爵
申錫榮名是用加封爾為一品夫人禕翟斯
煌祗荷鴻休之薦被絲綸有赫式嘉象服之

維宜

制曰朕惟生賢為國應千載之昌期積善千家
行百年之餘慶蓄厚者其施遠功盛者其報
隆粵有特恩光于奕世爾張寧乃具官四維
之曾祖父性稟醇良行敦孝友含貞抱璞夙
高長者之評委祉儲庥遠篤曾孫之祐相業
方茂先德彌昌賴酒醴麴蘖之資重水木本
原之念茲用贈爾具官於戲四世而昌垂令
名於不朽九原可作服峻秩以維新

制曰朕觀圖史所載閨闈之良或恒一德以終

身而未必自于蚤歲或罹百憂以撫子而未
必亢于厥宗惟備美以流芳宜曠世而滋顯
爾雷氏乃具官四維之曾祖母禔身貞淑秉
性幽閒顧蚤違于所天誓每嚴于皎日既鞠
孤子復撫孤孫不辭夙夜之拮据用嗣春秋
之饋享睠予輔弼有懷啓祚之功念爾艱貞
宜荷追崇之典是用贈爾為一品夫人懿則
如存尚重膺于渙渥嘉名肇錫庶永庇于雲
仍

制曰朕弘敷慶澤崇答巨僚勸相國家既獎其
贊襄之績績我祖考宜慰其似續之思爰有
顯褒以彰盛典爾贈通議大夫吏部左侍郎
兼翰林院學士張誼乃具官四維之祖父宅
心仁厚秉性樸醇悅禮敦詩德公之遺安畎
畝履仁蹈義太丘之表正鄉閭是開繩武之
賢作我調元之佐惟孫謀之克紹知祖德之
垂芳茲特加贈爾具階官申命自天寵數極
中朝之盛嘉亨在廟宗祊延奕葉之光

孫宗伯集 卷之一 十一

制曰家有世德流光施及于子孫國有殊恩命
秩兼隆于祖妣禮雖或限于今典義則可起
以至情惟我重臣被茲異數爾贈淑人王氏
乃具官之前祖母提躬令淑作配善良樹懿
範于閨闈遺善祥于胤祚雖貽孫翼子弗在
其身而積功累仁乃昌厥後睠中台之茂績
遡奕世之徽音是用加贈爾為一品夫人榮
名並烈祖之光九原增賁靈爽篤孝孫之祐
百世彌昌

制曰孫謀貽燕雖本祖功門閥肇興亦資內德
故王母有介福之寵俾後賢遂報本之思緣
情而推惟禮之稱爾贈淑人解氏乃具官之
祖母幽閒夙稟純懿性成矢志靡他不愧共
姜之烈保孤能訓式勤文伯之規傳子而孫
益昌且熾匪賴起家之厚澤曷成體國之崇
勲是用加贈爾為一品夫人天祐宗祊世篤
艱貞之節國推慶渥光昭垂裕之休
制曰眷我邦家碩輔忠孝兼資潤色皇猷茂佐

中天之運瞻依庭訓有懷愛日之誠宜推錫
顯之隆恩用慰尊親之至願爾累封具官允
齡乃具官之父慈祥樂善醇樸居貞雅尚清
修人共推其長厚高年茂德天乃錫之壽康
篤啓嗣賢躋登鼎鉉調元贊化謨謀本自其
家傳濟美承麻勲業豈殊于已出爰酬善誨
晋陟穹階茲特加封爾具階官於戲惟德致
福䟽榮特邁乎等倫移孝為忠詒教無忘于
終始服茲休命益介純禧

制曰朕敷慶群工推及其母雖緣情而錫顯寔
因分以致隆有若元僚素承慈訓輔弼之勲
既著劬勞之報宜崇爾贈淑人王氏乃具官
之母動合女師儀為邦媛相夫順正持儆戒
以相成治內明章秉靜恭而作範玉成哲嗣
晋位台司輔藻經綸教未忘于機杼鹽梅調
燮澤尚戀于栝棧宜薦褒嘉以彰聖善是用
加贈爾為一品夫人寵章晋錫未貽彤史之
芳顯號鼎新用作玄扃之賁

少傅兼太子太傅禮部尚書建極殿大學士
許國并妻誥命

制曰朕獨炳化原重新政典惟潤色裁成之助
屬同心輔相之賢國憲朝章咸歸黼藻

神謨

聖烈具載縹緗忠勤茂隆眷酬滋渥咨爾少傅兼
太子太傅建極殿大學士許大儒全學名

佐上才浩博淵宏涵匡時之道術端方直亮
樹表世之風猷以公望侍經緯弘資啓沃以

老成登宰席益嬋謨謀叅决弛張身荷天工
帝載分明枉直力回世道人心諳禮樂刑政
之宜綜述作文章之任當朕垂衣端拱

職以董百官繫卿領袖

籍奏于作弼提衡之日而功多于尹
儲載筆之年斟酌百王名符駿業經綸一代
法本鴻裁是惟致太平之書允禪顧問有如
條故事而上行倚平章可陟傳于孤卿藁進
班于近殿載敷寵告用答成勞茲特授爾階

光祿大夫勲柱國錫之誥命於戲虞帝命官
百揆兼于大禹周王訓治六官制自姬公尚
其虔秉同寅勤宣令甲惟德惟義以詔玉躬
是訓是行以扶皇極欽哉

制曰朕申布典章嘉台臣之潤色未懷圖史慕
哲媛之徽音肆獎答元功咸歸內美而懿揚
懿範不愛重褒爾具官許妻累贈一品夫人
汪氏秉德靜莊作述名碩追贈佩鳴環之助
雅著令儀眷當樞秉軸之勞彌宣往勩胡弗
偕老而生獨勤絲綸延禱翟之光泉壤閔河
山之度是用仍贈爾為一品夫人榮歆三命
埒顯爵于黃扉化衍二南紀芳華于彤管

制曰國家有大制作應重熙累洽之期臣子有
大勲勞徵積功累仁之効恩特隆于近輔德
必遡其曾先爾累贈光祿大夫少保兼太子
太保禮部尚書武英殿大學士許 乃具官
國之曾祖父雅志好修終懷高蹈戢身而隱
徜徉同 履而 儒者流光

四世

見統緒之遺是用加贈爾具階官報崇本始百年善慶猶新祐篤雲仍三錫恩華未艾
制曰國崇寅亮之勲三孤並秩家叶和鳴之兆
五世將昌宰席恩蕃曾闡慶洽爾贈一品夫人田氏乃具官許之曾祖母身持雅操力相
清脩佐高隱于徵君人稱齊德播幽芳于列女天與發祥庇懿肇以綿延鹽梅倚其調燮
惟啓祚之淵源甚遠肆揚徽之渙汗彌新是用仍贈爾為一品夫人寵極內階益增華於
窈窕福流中壺恒錫羨于本支

制曰帝王以繼述為達孝而毗德恒待于臣宰
執以贊襄為大忠而顯名恒歸于父偉茲國
典美爾庭聞爾累贈光祿大夫少保兼太子
太保禮部尚書武英殿大學士許乃具官之
父倜儻多竒溫良有讓躬萬石之行不出家
而教成賡五噫之歌一出關而身隱是父是
子業在遺經有君有臣政存方策人有技若

已有技保我子孫吾不為吾子必為施于邦
國是用加贈爾具階官功懋懋賞相門垂堂
構之光得全全昌禰廟勒鼎彝之伐

制曰朕申令庶官推功上宰嘉其增休于前政
則有顯褒念其稟訓于先慈則加崇卹爾累
贈一品夫人汪氏乃具官之母見超

躬隱佐冥鴻德尚垂于荆布

于箕裘皇猷藉黼黻之華聖善餘機
絲之誨易三公以一日風木悲深極九我于
三年蓼莪思切是用贈爾為一品夫人丕揚
相業報昊天罔極之恩疊被恩章慰大孝終
身之慕

勅命

南京兵部武庫司主事張正鵠父母并妻勅命

勅曰朕晉號 慈闈頒綸庶案所以廣湛恩同
休慶也其有夙構家艱而已復還朝列明詔
具存豈有愛哉爾具官正鵠策名高第通籍
太常陟官留都列屬司馬而恭勤清敏蔚乎
有聞樞籥之司裨益不細茲如詔指授爾階
承德卽錫之勅命爾今改秩秋曹民命是寄

尚以詰戎之慮為敬獄之圖惟爾之能庶朕
以懌

勅曰良士好脩賢妻善助故禮隆於敵體而恩
逮于俱榮是本彛章亦關勸典爾原任具官
妻封孺人周氏毓貞宦閤媿德儒門婉有婦
儀聞於閭閻爾夫以清勤著譽爾實襄之是
用封爾為安人祗承再錫之華益懋相成之

義

勅曰士有富文學砥行立名然無祿早世而其
遺胤不絕如帶此天道之所隱也俾熾而昌
若合於損益之理焉爾生負贈文林郎太常
寺博士張桐乃具官正鵠之父篤志好古慕
為純儒而不長厥年遽見其止幸哉有子起
稱部郎愍冊方新庶用以慰茲加贈爾承德
郎南京兵部武庫司主事生也有涯歿而無

憾

勅曰朕歲遣使者分行天下覽觀風俗其有閭
閻之間貞婦可褒表者具以事聞旌異如制

矧亮節一德廸子於成居朕卽列者乎則霽
恩豈有量哉爾封太孺人諸氏乃具官之母
本以女士歸以儒英遽而相捐矢以靡慝晚
沾祿養優游以終爾於往者居者俱無餘憾
已茲贈爾為安人永流彤管之輝長作玄局
之賁

表

百官賀

仁聖懿安皇太后表

伏以

慈謀協豫式隆

主配之求

孝理重光載舉尊

親之典後 鴻名於有永垂燕翼於無窮祐篤三

靈懽騰萬國恭惟

仁聖懿安皇太后陛下 幽閒貞靜 光大含弘
相

穆考於至寧心存儆戒啓
今皇於初服化行雍熙更勤

廟 社之深圖爰命 宮闈之肇建擇 賢儷
聖登太姒而太妊之教彌章治國觀家正長秋而

長樂之顏益慰矧 兩宮之媿美宜
五位之推崇穆卜良辰重申

大號黃金字燦宣

寶冊以揚休翠羽儀開伏

璇宮而展慶增賁

彤闈之奉茂延 紫極之禧益 堯德蕩蕩以

難名而 舜心夔夔之愈慄求式家邦之範

丕昭史筆之華臣等幸際 明昌欣逢 盛

美

天門日麗拜瞻莫罄於階藜 禁籞春遲承藉思

依於輦草伏頌

福隨德厚 壽與名齊養以九州 椒寢時聞

乎視膳備茲百順 蘭房早遂乎含飴

命婦賀

仁聖皇太后表

伏以

化基

宮闈治內儷治外而稱尊 禮重

宗祧

長樂得

長秋而衍慶盈

廷有爛含氣胥懽恭惟

仁聖皇太后陛下

貞順夙成

肅雍允備 鷄鳴致傲陰毗穆穆之風

樛木示慈誕發振振之瑞

聖躬允資於啓佑

母道聿顯其光華

德比珩璜 名輝圖史屬者軫

帝齡之方茂感風人之好述謂萬福之原始諸匹

配而二姓之好象彼乾坤慎選

淑媛俾承

宸御文王嘉止

文母之福履彌綏太姒嬪京

太妊之徽音克嗣九有慶

中闈之有主六宮仰

慈極之增輝妾等幸際

熙辰忻逢

嘉禮祗深雀躍莫罄嵩呼伏願

百世本支長奉含飴之慶

萬年景命永承思媚之庥等無任懽抃之至

命婦賀

慈聖皇太后表

伏以

坤維貞靜承

乾德以含光 婦順明章纘

母儀而協極化宣閨闈 慶溢家邦恭惟

慈聖皇太后陛下

德蘊貞純 性涵溫惠 居惟循夫圖史

動悉應夫箴規 翌贊功深顯塗山之佐大禹

劬勞德茂同慶都之誕神堯

長樂尊崇致養方隆於萬國洽陽嘉止卜祥爰儷

乎

一人 主饋得賢承

祧有賴龍休徵於篔簹表令範於椒蘭

縟典告成 徽音克嗣妾等幸叨 壺教仰荷

慈恩祗深懼忭之誠莫罄揄揚之悃伏願

貺增視膳

祉遂含飴

蟄蟄繩繩百世綿

本支於有永

皇皇穆穆萬年歌

景命於無疆

命婦賀

中宮箋

伏以

紫掖升華肇啓二南之化

彤庭渙命適觀六禮之成慶溢寰區歡騰臣妾

恭惟

皇后殿下

鍾祥令族 毓粹神都 質柔順以俛天 德

安貞而應地屬

聖齡方茂來嬪有待於塗山乃

天意攸鍾作合已占於涓涘肆協神謀之吉爰徵

文定之祥禱翟光華星軒朗潤獻稷種而相祀

春秋奉

九廟之烝嘗羞脯栗以承懽左右致

兩宮之孝養聿章婦順允稱母儀象彼坤維配軋

元而載物方之月彩儷日馭以中天永膺函

夏之歸心茂迓

長繩之介祉妾等幸際光華之旦獲從朝謁之

班慶忭實深揄揚莫既伏頌

化光壺政

道贊

皇風

慶鍾乎麟趾螽斯穆穆皇皇益衍無疆之祚
和徵于葛覃樛木雍雍蕭蕭恒培有美之祥

致語

兩宮宴會致語

伏以

慶協 慈闈 寶冊鴻名昭百代祥開壽域瑤
圖鶴筭啓千齡尊崇同宇內之懽心宴樂盍
人間之盛事正韶華未老

天顏有喜偏宜更化日初長

景命無疆預祝宸難逢良辰羨景爭快睹綺席
芳筵恭惟

聖母仁聖懿安皇太后陛下得一以寧秉德建儀
刑之極履正而順濬猷垂格佑之圖

聖母慈聖宣文皇太后陛下起塗山而相禹篤生
克繼之賢嬪渭涑以興周誕育丕承之聖允
矣 兩宮媲美居然五位承惟恭惟

皇上至聖至仁立愛立敬念百方擁祐恩罔極以
齊天思九我劬勞養無方而愛日適擇儷初
成於縉典肆揚休載晉於徽稱普

皇仁下詔彤墀介

聖壽稱觴紫極鍾鳴禁裏雙扶鳳輦下天來彩戲
階前百拜龍章呈日麗看宮花一萬壽萬樹
曉風吹遍薦仙實三千年千年春色妝成太
液池管取作瑤池翠管銀璈合奏宜春苑從
教為閔苑黃鸞青鳥俱飛玉露瓊漿寶鼎分
將御醞駝峰麟脯瑀盤擎出天厨可知天上
神僊從此會安臻福壽端是女中堯舜繼自
今坐閱勲華臣等身處掖庭職叨法部幸沐
二南之化多慚蕩蕩難名聊抒三祝之忱敢

擬洋洋足聽御筵雙啟奉

慈闈

聖主尊親願不違禁樹千層迴鳳輦宮雲五色護
龍衣鶯聲弄曲歌全泄花氣侵杯酒漸微共
祝含飴還介祉年年長得頌恩暉

謝表

丁丑進士謝恩表

伏以

彤墀賜對幸瞻

上聖之虛懷

玉陛敷言濫被

清時之盛選遇

主深慚于蹇劣致身胥慶于遭逢

天祐文明人沾

渥澤恭惟

皇帝陛下

法天行健

稽古右文

負袞疑旒德政每勤於旻日

細旃廣廈譚經不輟於初寒

普菁莪之化以作人

弘鞞鐸之規而盡下士爭磨濯世會雍熙方允

升於大猷乃猶切于

清問

臨軒而策究心乎國計民生

側席以思加意於官常武備斯蓋已治而憂未

治故欲有為以享無為詎期草野之敷陳獲

荷

楓宸之採擇臚傳

內殿宴啓南宮色燦冠袍特拜

尚方之賜榮頒錘楛均叨

左藏之珍非啻用其言而顯其身抑將循其名

而責其實

恩蕃普錫式增士類之光道協泰交益顯儒風之
振若為稱塞徒有凌兢臣等敢不彌堅初進
之心勉責後來之効先資成信誓終始以勿
攜補過盡忠期夙宵而匪懈庶以明

君逸臣勞之義亦庸荅

天高地厚之仁伏願

純心任賢

遜志典學

祖虞舜之兢業聿收亮采之功

師文王之緝熙直擬顯謨之盛臣等無任瞻

天仰

聖激切屏營之至

庚辰進士謝 恩表

伏以

聖主右文懿典重臨軒之策

清朝通籍

隆恩叨賜第之榮言揚畢慶於泰征禮遇深慚乎

孫宗伯集 卷之二 三十一
晉錫遭逢甚盛感戴難勝茲蓋伏遇

皇帝陛下

天啓神明

日新聖敬尊

親饗

帝體仁孝以綏猷

講學親賢本身心而立教備舉禮文之事弘開
俊乂之途謂聖道洩於九疇而皇極妙於三
德歷陳經訓深究化原闡御世之規歆以祛
偏陂好惡求宜民之道思以善正直剛柔

賜一日之燕閒垂

九重之清問當神禹叙疇之日切姬王訪道之心
方虞登對之難酬猥荷

覽觀而並錄臚傳

內殿燕錫南宮色燦冠袍特拜

尚方之貺恩頒錘楮均承

左歲之珍風雲之感會非常雨露之沾濡更渥
儒風丕振士類增光臣等敢不堅守先資勉

圖後効惟忠惟孝雖溫飽以何心是訓是行
庶光華之克覲竝膺會歸之化少酬

高厚之仁伏願

兢業圖幾

儉勤保大

五福時歛益培沕穆之淳風

萬邦以貞長享平康之盛治

擬

駕幸文淵閣謝表

伏以綸扉地密清華依日月之光

泐駕天臨藻衛擁風雲之色惟賢君能有禮下

之盛節在儒者以為曠古之竒逢喜動巖廊

光生縉笏恭惟

皇上神授當天

生知作聖

典學而經帷日御篤商宗思道之誠

咨政而便殿時詢邁殷后訪予之想

乾緹獨總釐百度以維新

震疊旁行輯九圍而丕式即號為臯夔伊傅莫
能望其下風豈凡為師保疑丞皆得陪其末
議何期

聖德特溥

宸光謂內閣創自

文皇位崇鼎鉉而閣臣首乎群辟職轉鈞樞爰從
臨御之餘式枉文淵之

駕覬

翠華之迢迢恍飛動於雲間驚

清蹕之傳呼忽降從於天上聖塵瞻拜

威顏咫尺以非遙侍輦從容

慰諭再三而特至匪啻誇

宸游之逸豫義存明目達聰雖名矚秘閣之清嚴
禮原用上敬下

飛龍顯象初疑帝所之夢游舞獸均懽終荷

僊輿之親駐彼慶曆引輔臣於天章非同賜幸

而隆平閱書史於秘省無取疇咨卓矣

清朝昭哉曠典動書左史未傳泰道之交恩播

外廷共慶

謙光之照蓋

聖人之舉動非常而儒道之遭逢甚盛也臣等位
司密勿才乏贊襄近

耿光於九天處慚非據沐

恩數於三接榮反為憂敢不屬米淵惕履之心

對

天日照臨之鑒曰為先後曰為左右不忘夙夜以
孜孜國爾忘家公爾忘私永佩玉臣之蹇蹇

伏願

聖不自聖

謙而愈謙

精神交通不獨尊崇於禮貌

簾陛不隔常如接見乎師儒則

帝德罔愆行駕今而軼古

皇猷允塞終咸五以登三矣臣等無任瞻

天仰聖激切屏營之至

擬唐以御製金鏡述頒示侍臣謝表

貞觀二年

貞觀二年某月某日具官臣某等伏蒙

聖恩頒示

御製金鏡述謹奉表稱

謝者伏以

明王制治

瑤編洗稽古之猷

聖主覃恩

寶訓廣敷言之益妙述既隆於一代虛懷復切
於交脩受帙知榮拊躬增媿臣等誠懼誠忤
稽首頓首上言切惟帝王成盛治必資千古
之緒言臣子効微忠恒籍一人之錫類故道
詢疇範周王願治惟勤而歌賡明良虞帝交
倣彌切自秦不師古空留壁裡之遺編迨漢
不事書益沿馬上之餘習武帝訪求雖遍那
思鑒以為師宣宗章奏徒勤未見頒之作式
事如有待道不虛行茲蓋伏遇

○○○○

天挺英資

日新帝德

布昭聖武輿圖弘一統之規

丕殫皇仁大業奠萬年之固

從諫擴轉圜之量雖小不遺

用人妙器使之公無微不錄蓋愛民疊疊治已

軼於先王而望道孜孜心不忘於今日

牙籤晴日麗刻意校讐

錦軸彩雲分留心編輯事關國體撮其要而析

其詳道切君身提其綱而悉其目鸞迴鳳翥誠

哉經世之英萃璧合珠聯允矣安邦之訓典

鑑取人爲善之義踵述而不作之名用命爲

金鏡之述以成書爰頒諸近侍之臣以廣惠

琅函燦爛曉來閭闔生寒寶墨淋漓春到縹

緗動色捧歸薇省爭看誥訓之章伏讀蘭臺

驚睹典謨之筆將來以傳之世世抑持以示

乎人人是誠

天子勸忠之大端夫亦

聖人懋德之明驗也伏念臣位列章縫班聯侍御

聖心未拭慚無磨練之才暗質初開愧乏光明之業敢不矢心潤色竭力宣揚視製如謨儆戒不忘於夙夜對言如鏡開陳無替於始終於以光

聖德於無疆且以煥

王言於有赫伏願

聖不自聖

謨而又謙謂古人為必可師探意緒於編摩之外謂古治為必可復揖精神於夢寐之中則

四三王六五帝未為後人著述之端三十世八百季應作奕世明良之鏡矣臣無任瞻

天仰

聖激切屏營之至謹奉表稱

謝以

聞

擬宋王曾詮錄古先聖賢六十事繪圖以

獻

上降詔褒美

命禁署月進二十軸仍鏤板印

賜近臣謝表

天聖元年

天聖元年某月某日具官臣等伏蒙

聖恩以輔臣王曾所

獻古先聖賢六十事圖既

降詔褒美

命禁署月進二十軸仍鏤板印

賜謹奉

表稱

謝者

伏以賢臣翌運瑤圖弘稽古之猷

聖主當陽

玉詔廣納言之益

睿覽既厯於

宸御

王綸復布於臣隣捧帙知榮拊躬增媿臣某等誠
懽誠忭稽首頓首上言竊惟帝王隆德業必
師古昔之聖賢朝廷懋元良恒謹燕閒之禁

署雖堯舜禹湯文武之聖咸自得師即臯夔
伊傅周召之賢並言太古日新時敏卓立勞
規廷戒宮嚴丕昭懿範自謨弼之風既氓而
憂勤之治遂衰臨政優游孰揖古人於夢寐
坐朝懈怠誰知敬德於稷清金鑑之錄徒褒
千秋何補太平之賢日進五位奚裨况一人
雖得於鑑觀而列侍未蒙於錫黜事如有待
道不虛行茲蓋伏遇

○○○○

剛健中正

文武聖神

問膳問安孝特隆於

內寢

不蓄不殺仁常溢於遐方

中夜止燒竿念念不忘乎茂對蒲朝無指鹿人
人咸服其

公明蓋千古聖賢既已仰躋其駕而一時銓錄
猶然俯納其忠繪成六十圖

褒詔恍從丹鳳下月進二十軸

溫綸還向

紫扉來爰鏤之版以成書更

賜之臣以廣惠牙籤初啓雲排閭闔曉生寒錦軸
甫開日映縹緗春動色坐藜閣而清宵展卷
俄驚見於二帝三王扶琅函而子夜還家歆
永傳於千年萬祀此誠臣子逢時之幸抑亦
聖人懋德之徵也伏念臣某等職列章縫班聯侍
御科名濫厠慚非玉曾不媿之才圖籍叨承

羞負

皇上求賢之意讀經語如聞

天語對格言若服

聖言敢不矢志書紳開心補

袞發古先所未發聊闡素心陳

今日所已陳略輸丹悃務續百年之道統用開
萬世之太平伏願

聖不自聖

謙而又謙

得意忘言備德期於罔覺

識心忘象進學底於無疆則治烈鬼我永作後
人之圖畫竒功卓越應成他日之刻鏤地久
天長固

金甌於億載山凝川永綿玉曆於萬年矣臣無
任瞻

天仰

聖敷切屏營之至謹奉

表稱

謝以

聞

擬輔臣以所撰大寶箴註進講

賜銀八寶謝表

伏以

帷幄敷陳古訓闡責難之益

瓊瑤賁錫恩光昭受善之勤德業起于相規地

天占其交泰榮生籤軸色動簪紳臣其等誠
惶誠恐稽首頓首上言竊惟帝王之大寶曰

位位實艱難臣子之効忠以言言何容易慨
黃虞下降皆繇茂德而亡猗李唐初興特用
求言而烈太宗持錄兢乎若隕深淵蘊古獻
箴亟矣如罹覆轍俯仰古今之際覽觀治忽
之源原公明之體合照同仁歎欲樂之派生
哀召禍欲其去桀而太紂即宮室飲食聲色
貨利之俱防望其為高而為文故慶賞刑威
耳目聰明之備飭詞不煩而意自足言有盡
而心無窮豈獨罄一時欸欸之忱亦且垂萬
代明明之鑒蓋君道主於憂勤勤則勞勞則
有功而鞏苞桑之固抑國政隳於暇逸逸則
惰惰則不振而貽復隍之虞在古多然于今
宜慎恭惟

皇帝陛下

英資穎特

睿學光明敬

天法

祖勤民凝圖穆穆

親賢遠奸去佞嗣服昭昭

御藻親裁十二事之鴻銘日揭

朝綱獨攬億萬年之大法風行治以躋于至康
貞觀敢望化全流于默運箴訓何裨顧臣之
愚猶盛之懼念拘孿俗學即輔弼之任奚稱
而掇拾前聞或芹曝之私可達遂忘其陋輒
註斯箴句析條分法略依於訓詁言詮字釋
事咸究其指歸取其明白易知俚詞並採期
於感發生懼已意兼施詎謂資

九重天縱之明祗以發一得愚衷之見寧知進講
遽荷

殊恩 賜出 尚方分揚州之三品頒從

內帑集寰宇之八珍開函則合璧連珠燦一天
之星斗入袖則握瑜懷瑾騰百丈之光華疇
若予工能使川呈海現惟德其物應令澤潤
山輝彼箴言實始徒聞東帛之頒乃講解何
功過冒

竒珍之賜是微臣芻蕘之遇比蘊古特隆而

皇上採納之深過唐宗甚遠也臣等阿衡有職作
礪無才註䟽卑卑補袞漸無一字

恩私種種許身媿比雙金敢不夙夜謨謀捐糜
報稱盟心以對共圖保泰之猷載寶而朝時
祝駢蕃之寵伏願

以逸居逸雖休勿休

惟危惟微惟精一以執厥中慎乃有位

曰慈曰儉曰不敢以先天下寶惟其賢則德日
以盛業日以昌莫永無疆之曆天不愛道地

不愛寶長流至治之光矣臣無任瞻

天仰

聖敷切屏榮之至

策

廷對策

臣對臣聞帝王之繼天以立極也端其本以為學而後可以立天下之治原審其要以出政而後可以弘天下之治化何者人君之學非徒以資誦說也凝神於宥密涵養於穆清固羲皇以來之道統所賴以繼之於無窮者也本之弗端則其學也為儒生口耳之學而何以造於天德之精人君之政非徒以飾文為也任君師之責

為治教之宗固義皇以來之道統所賴以行之
於不替者也要之弗審則其政也為後世粉飾
之政而何以臻於王道之極惟求端於本而不
徒事於口耳之粗則愈涵泳而愈克周時敏之
餘皆實學也聖德所以同天而至治之原於此
乎端矣惟致審於要而不徒事乎粉飾之具則
愈敷施而愈恢廓推行之際皆實政也而至治
之化於此乎成矣學以基政政以顯學道合一
而不偏學務其本政舉其要事不勞而可據自
古帝王不出遼密之中而道積厥躬萬世稱至
學不煩措置之力而事得其理萬世稱至治者
此道行也况出震維新正道岸誕登之始繼離
方早正人心望治之初可不取其所當急者以
為典學之本擇其所當先者以為立政之要也
哉欽惟

皇帝陛下

弱齒含元岐嶷神授

十齡出閣溫文日新正位

宸極而玄德愈光

委政者頌而王猷益擴嘉納

帝鑒圖說而披覽不倦一舜典堯謨之式

命書四箴六箴而顧諟不忘一湯盤武凡之銘

近又渥

經筵之賜

嚴覲吏之飭蓋學已至矣政已弘矣軼於唐虞

三代之盛矣乃猶不自滿假進臣等於

廷俯賜

清問首舉商周之訓次及漢唐宋君臣之事而

終策臣等以典學立政之要慎始篤初之規豈

意臣等習先聖之術明當世之務有足以裨萬

分之一者乎而臣非其人也雖然臣愚學慚稽

古志切摠忠敢不披瀝罄竭以對臣聞之君吝

天之子也民之主也為往聖繼絕學者其道也

為萬世開太平者其責也故美玉不琢則射斗

之光不生寶鑑不拭則映日之輝不發聖人不

學則光天之德不耀甚矣哉學之弗可已也然

不曰壯而好學如日中之光少而好學如日出
之陽嗣服之始學其不尤要乎家而無政則大
夫無以著浚明之勲國而無政則諸侯無以樹
亮采之績天下而無政則天子無以布清寧之
化甚矣哉政之不可忽也然不曰慎厥初惟厥終
終以不困不惟厥終終以困窮嗣服之始政其
不尤要乎是故臨朝願學臨政願治凡為哲后
睿皆然而始尤重也論學以輔德論政以輔治
凡為良弼者皆然而始尤切也粵稽諸商太甲
高宗謹守成者也臣考其初則有伊尹傳說之
誨矣人紀之修風愆之戒非伊之所為訓王者
乎遜志之益聰明之憲非說之所為詔王者乎
臣言焉君行焉此所以終允德而靖殷邦也故
終商之世而曰中興之令主者必推太甲高宗
也載稽諸周成王亦善守成者也臣考其初則
有周公之誨矣紹庭上下陟降厥家非訪落之
詩所為作乎稼穡艱難政事勞瘁非無逸之書
所為戒乎臣言焉君聽焉此所以覲耿光而揚

大烈也故終周之世而曰繼述之賢君者必推成王也然學勤矣而所以典其學者有本政勤矣而所以立其政者有要三代以後此義不明強學之主誠代有之而記誦之習興矣光武夜分講經而昧三公之體太宗歲周御覽而失兄弟之義英宗不廢講讀而暗禍階之萌顧洪業之建乃出於不事詩書之漢高此其故何也天授之資固足以創大業而惟其棄焉不學學焉無本此高之所以止於高也勵精之主誠代有之而粉飾之風盛矣始皇衡石程書何補於秦之亂文帝漸士傳餐何益於隋之亡宣宗汗服而不倦何裨於唐之衰顧致理之效乃出於清淨無為之漢文此其故何也玄默之修固足以致治平而惟其政之不更立之無要此文之所以止於文也天啓休明生我

皇上

日親講幄而進學之志寒暑不忘

日咨輔臣而求治之思細大不廢蓋法天行以

勵學獨超於章句之外憲天道以出政深探夫
理道之原即商周之主不能過之即詩書所稱
何以加焉我

二祖

八宗之丕緒真足以振揚於不墜矣顧臣伏讀

聖制有曰論者謂帝王之學與韋布不同蓋不在
章句間也不知舍章句之外又何學歟又或謂
主好要則百事詳所謂要者果安在歟臣有以
見

陛下之心聖道未見之心也視民如傷之心也夫
帝王之學與韋布不同此程子之言也所謂知
學之本者也主好要則百事詳此荀卿之言也
所謂知政之要者也是故往代之臣各執其見
以陳正始之謨而往代之君亦各因其謨以裨
正始之治如漢自仲舒天人三策之後有王吉
變倍之論匡衡審尚之䟽與夫六戒四儀之陳
貢禹節儉之勸陳寵蕩滌滌煩苛之議皆為當時
學與政設也然而諸君之寂著者不過表章六

經臨雍拜老吏多循良治多聰察無他本與要
不在也宋自先天元祐之間呂公著陳十事以
助新政司馬光獻三劄以隆治平與夫熙寧間
程顥有稽古正學定志之說皆為當時學與政
設也然而諸君之疵著者不過雅好儒術崇尚
文學紹述有聲又安數載無他本與要不在也
然則本何在乎聞之上學以心下學以耳欲得
其本純心之道不可不講也要何在乎聞之用
人者用天下而有餘自用者為天下用而不足
欲得其要任人之道不可不講也請因
聖問之所及而極論之

陛下終篇策臣曰爾多士習先聖之術明當世之
務其為朕折衷衆論究其指歸典學何急並政
何先或古今異宜創守殊軌悉茂明之以副朕
慎始篤初之意臣愚以為人之一心操存舍亡
其幾至可畏也况人君之心而欲攻之一念弗
純欲且乘之入焉其係於學之進退非淺小也
必也戒懼於不睹不聞之時慎獨於莫見莫顯

之頃至善為主善為師不息不移允迪可期
帝王為學之本或奢其在是歟譬則水焉清之
終日可見者晷不過一撓莫辨方圓誠不可以
不慎也故曰日月久照不改其明星辰久旋不
改其度聖人久於其道不輟其功學至此天下
之至學也非裝綴為能品藻為工矻矻終年者
比也人之一身一日二日其事尚難兼也况人
君之一身百責萃之人而弗任則事且因之以
隳焉其係於政之得失非淺小也必也精其擇

於任用之初專其任於簡畀之後不信讒間不
責細事惟和一政事乃又帝王為政之要或
者其在是歟譬之御焉輓軌不具其何以行有
其輔之一日百里誠不可以不審也故曰酒非
麴蘖則無與成羹非鹽豉則無與和君非賢臣
則無與治政至此天下之大政也非出納必躬
案牘必親厘厘守法者比也於乎此典學之大
本也立政之大要也然臣又有獻焉純心以為
學而任人之本即存傳曰為政在人取人以身

此之謂也任人以立政而輔學之資有賴經曰
朝夕納誨以輔台德此之謂也顧臣不患

陛下弗純心以為學而慮聰明之太過或以為商
周之主不足法而求於學之外焉不患

陛下弗任人以立政而慮英敏之太過或以為商
周之君不足法而求於政之外焉求於學之外
則索之愈高而失之愈遠將有談正道而尚曲
學如公孫弘之惑武帝矣求於政之外則更之
愈急而行之愈弊將有口堯舜而心桑孔如王

安石之惑神宗矣此臣愚之過計固然而亦豈
可以弗早戒哉伏願我

陛下上畏

天地近瀆

祖宗無以學至矣而驚於高遠無以政成矣而事
於紛更無以浚居而好逸游無以物力豐盛而
事土木無以海宇昇平而事遠夷無以安處深
宮而狎近習則道德高厚功化洋溢內恬外熙
瑞應祥集虞夏商周不足侔矣况漢唐宋乎哉

臣不識忌諱干冒

天威無任戰慄隕越之至臣謹對

季男源文百拜謹輯

程